



BERICHT: STAMMZELLENSPENDE TOM REGER 18.05.2016

Virun e puer Joer haat ech mech, am Kader vun enger Mobilisierungsaktioun vum Plooschter Projet an der DKMS, spontan als potentielle Stammzellspender registréiere gelooss. Ech hunn mer geduecht: et deet net wéi, et kascht näicht, et ass schnell gemaach, an enner Emstänn kann een engem schwéier kranken Mensch eng Chance op en neit Liewen ginn. Außerdem ass d'Chance, um Enn wierklech fir eng Stammzellespend a Froo ze kommen, enorm kleng.

Ech haat deen Moment net geduecht, dass ech knapp 2 Joer duerno en Uruff vun der DKMS kréien, dass ech an enger méi enker Auswahl vu Leit sinn, dei fir eng Stammzellentransplantatioun a Froo kommen an op ech nach weiderhin bereed wier, falls dann méiglech, eng Stammzellespend ze maachen. Doropshin misst ech eng Blutanalyse maachen, an kruut dann, no e puer Méint, gesoot dass ech am Laaf vum nächste Mount eng Spend kéint maachen. An zwar, wei an 80% vun den Fäll, net enner Vollnarkose, mee iwwer Blut-Entnaam. Bis dohin gouf ech e puer Mol ausdrécklech gefrot, ob ech nach emmer bereet sin, ze spenden; et ass also absolut fräiwelleg.

Sech et awer nach aanescht ze iwwerleen géif deemno respektéiert gin (!!). Eng Stammzellespend kann een nemmen an e puer spezialiséierten Kliniken maachen, ech haat d'Chance, net verreesen ze mussen. Sollt dëst de Fall sin, iwwerhellt d' DKMS all d'Käschten. E puer Wochen virun der Spend misst ech eng Keier an d'Spidol, fir mech ennersichen ze loossen. 5 Deeg virun der Spend misst ech mer en Medikament spréetzen, fir d'Produktioun vu wäisse Blutkierpercher ze stimuléieren, daat war awer ganz einfach an deet och net wéih. D'Transplantatioun dauert am Duerchschnitt 4-5 Stonnen.

Bei mir huet et gudd 8 Stonnen gedauert (op 2 Deeg verdeelt), wéll den Empfänger e Kierpergewicht vun 120 Kilo haat an deemno ganz vill Stammzellen gebraucht huet.



D'Blutt gett un engem Aarm oofgeholl, leeft duerch eng Maschinn dei d'Stammzellen eraus filtert, an duerch den aaneren Aarm erëm zeréck an de Kierper. Et deet absolut nët wéih, et ass just e bësschen ustrengend, well een sech während der Transplantatioun net vill beweegen kann an een duerno zimmlech midd ass.

Fier um Enn awer gesoot ze kréien, dass d'Transplantatioun gutt gelaaf ass an et dem Patient esou wäit gutt geet, waar et deen klengen Opwand awer definitiv wäert. Et war op alle Fall eng speziell an interessant Erfahrung fir mech, an e kranke Mënsch iergendwou op der Äerd huet elo eng Chance op en neit Liewen!

TOM REGER